

## **Peduru tapara papeu humo Sesus tuktsa bo ziwatahaka nanabyitaba napykyryknaha**

Peduru Sesus tuk zinymyrykyta. Sesus tuktsa bo ziwatahaka nisiakusukniki. Sispirikpobyitsa nisisapybyrikinaha iwatahi sibo ziwatahaka. Deus Peduru ziapewywyky iwatahi Deus harere ziwatahaka. Aba katsa kino niwatihi Sesus soho humo tanymyryky.

<sup>1</sup> Utakta Peduru. Kiristu Sesus iakzohota. Sesus Kiristu kape niy:

– Ikia myzubaha bo tsimy. Nanabyitaba wasania ty tytsaso – niy.

Yhỹ iky.

Aba ikiahatsa Deus tyryktsa bo piwatahaka. Zahawatawy. Nanabyitaba tsinapykyryknaha. Põto eze tsinapykyryknaha. Karatas eze, Kapazosia eze, Asia eze, Bitinija eze iwa tsinapykyryknaha. Sihudikhudikwy ezektsa ahasoho – O bipyritsa – mykaranaha. Deus batu – Asahi katyryktsa – my.

<sup>2</sup> Deus myzo koikny bakta tu niy:

– O asaktsa mysiwatawy. Amy skaraba niwa nikara, asaktsa mekywa tu moziknaha simysapyrẽtsa moziknaha iwatahi mysiwatawy. Sesus Kiristu harere bo yhỹ mynakanaha iwaze simysapyrẽtsa moziknaha. Sesus katse babata sisapy zeky nihyrikosokda iwatahi kahyrikoso situk mynapykyryk – niy. Aba Deus bo ahasoho motsasoko:

– O myzo atyryktsa humo tysipokzitsikikta. Asaktsa nanabyitaba mynapykyryknaha tysisak-ihikykta. Ahumo sakurëtsa babatsa moziknaha – my. Iwa Deus bo mopamykysoko.

*Deus sapyrënikiha ty ana humo hi tsinamyspihikiknaha.*

<sup>3</sup> Katsaktsa Deus tsimytsasokonahaktsa:

– O Deus myzo ikia zuba tsamysapyrëta. Ikia Sesus Kiristuzo tsimy wasani tsimykara – tsimaha. Atahi Sesus Kiristu nihyrikosokdaze izihrizikpowy. Iwatsahi katsa ihumo tsimyspirikponaha zeka Deus tyryktsa tsimoziknaha. Deus myhumo tsimypokzitsiarëta iwaze ihyrytsa tsimoziknaha.

<sup>4</sup> Iwatsahi tsipperyknaha. Deus tuk mywahi tsimynapykyryknaha iwatsahi taperyky. Deus bijoikpe eze tu isapyrënikiaha ty kïno mybo nyny my. Deus mybo nyny mahaka ba zikyryry batu hawa tohi ziky ba zikokda. Deus isapyrënikiaha ty tawahi mynakara anatyhi Deus mybo nyny my.

<sup>5</sup> Deus isapyrënikia ty tabaze botu zikymy. Sesus Kiristu humo tsimyspirikponaha zeka Deus tawahi ahahumo tsimypokzitsiukrëta. Aibani hawa ibo mymyoktyhyryk ana hi myzubaha bo piwatawy. Ituk mywahi tsimynapykyryknaha ana hi taperyky.

<sup>6</sup> Ana soho bo hi mytsaty tynakaranahaktsa kytsa! Ana humo hi ahakurëtsa. Mybarawy eze tuze tsimyzurukunaha batu ahaku. Sinini tsimykarana humo ahasukatsihikrëtsa. Ahamyitsapyri humo batu ahaku. Pahamyi-jaikiknaha humo batu ahaku.

<sup>7</sup> Ouro wa tsipokzitsarēna katsaktsa ouro wa. Katsa kino Sesus humo myspirikporētsa zeka ihumo mymypokzitsirētsa hỹ. Katsaktsa ouro izo bo piakzazanaha wa takpyky amybara tu ja iwaze amy ty ouro baba zuba motare, iwa Deus niwatihi mybo my. Sinini tsimykaranaha zeka Sesus humo myspirikporētsa ana humo hi tsihyrinymyrēta. Sinini tsimykaranaha zeka Deus harere bo yhỹ tsimykaranaha. Myspirikporētsa hỹ wasani tsimykaranaha. Ba zikpyk ana humo hi Deus tsihyrinymyrēta. Ouro izo eze ky waha. Sesus Kiristu myziksizoze Deus ahape:

– Kaokzeka ikiahatsa ahamysapyrētsa. Aha-harere wasani Sesus watsa ahapunihikrētsa tsi-moziknaha – my.

<sup>8</sup> Katsa Sesus Kiristu bo batu iktsa zikaha iwatsa tu ihumo mymypokzitsirētsa. Aba ihumo ba zynaha iwazehi ihumo ahaspirikporētsa hỹ. Ahaspirikporētsa zeka ahakurētsa tsi-moziknaha. Sesus Kiristu humo ahakurētsa hỹ.

<sup>9</sup> Ikiahatsa Sesus humo tsikspirikpokonaha. Iwatahi Deus bo pahaoktyhyryk. Aba ahakurētsa Deus baze tu tsinapykyryknaha iwatsahi ahakurētsa hỹ. Abaka ikiahatsa ituk tsimynapykyryknaha. Tawahi ahahumo abaka ba zikmyrek tsahahyrinymyrētsa hỹ.

<sup>10</sup> Tubabatu Deus sohokotsa mytsaty nikaranaha. Hawa Deus mybarawy eze ktsa mysipokzitsiki ana soho bo mytsaty nikaranaha. Anahi zinymyry tsihikiknaha. Asaktsa:

– Hawa Deus hyrytsa humo mysioktyhyryk. Hawa ihyrytsa humo tsimypokzitsiukrēta – nikaranaha. Iwa ziknapamykysokonaha. Tapara

Deus mybarawy ezektsa mysioiktyhyryk iwa Deus sohokotsa ziknapamykysokonaha.

<sup>11</sup> Kiristu hyrikoso Deus sohokotsa tuk niapykyryk. Ata soho sibo nitsasokoro. Ata soho:

– Deus zipehata sinini mykara. Sininiwy nepykze Deus isoho “O katse humo kakurēta” – my kytsa isoho humo niwatihi – O atakta imysapyrēnikita. Wasani mykara – maha. Anasoho ziwabynahaze Deus sohokotsa hi:

– Aty skaraba Kiristu hyrikoso mybo hi motsasokoro – nikaranaha.

<sup>12</sup> Deus sohokotsa ispe niy:

– Batu ikiahatsa bo zuba katse sinini mykara. Aiba ezektsa kino niwatihi sinini mykara – niy.

Taparaktsa Deus sohokotsa ana harere ziknatsasokonaha. Abaka kytsa Deus wasania ty ahabo motsasokonaha atsatu ahabo motsasokonaha. Deus hyrikoso harere humo motsasoikiknaha. Ata kino Deus bijoikpe ikny inasikta ata soho motsasokonaha. Bijoikpe iknyktsa Deus tsumuēhītsitsa kino niwatihi inasikta harere pinymyry tsihikiknaha.

*Deus imysapyrēnikita. Iwatsahi ahamysapyrētsa niwatihiiktsa.*

<sup>13</sup> Kyze iwatsahi meky watu tsimoziknahaktsa! Sesus Kiristu myziksizoze Deus tisapyrēna ty ahabo nyny my ihumo myspihikrētsa. Ahanamy bo ka mytsaty mytsaty byitaha. Sesus Kiristu myziksizo naha bo zuba mytsaty tynakaranaha!

<sup>14</sup> Tapara ahaspirikpobyize ahasopyksapybyitsa ziknakaranaha. Abaka mahani. Deus harere bo hyŷ tsimykaranaha ana humo hi tsinymyryknaha. Amy ty wasani tsimynakaranahaktsa!

<sup>15</sup> Deus imysapyrēnikita. Ata kino ba zimyi. Atahi zahawatawyhik. Iwatsahi ikiahatsa iwata tyzurunahaktsa! Ahaharere wabymybara byihuja ahaharere humo kino wasani tynakarana-haktsa!

<sup>16</sup> Deus papeu humo botu ziwatahaka:

– Utakta ba zimyi. Kamysapyrēta. Iwatsahi ikiahatsa kawatu tykaranahaktsa. Kawatsa tihi ba zimyinahaktsa – niy.

<sup>17</sup> Iwaze Deus bo tsimypamykysokonahaze ipe tsimaha:

– O Deus myzo – tsimaha.

Atakta myzubatsa astsatutsa watsa isopyk. Hawa mykaranaha ty motsaso. Asahi wasani mykaranaha zeka isapyrēnikia ty sibo nyny my. Asahi sisopyksapybyitsa mykaranaha zeka sinini ykarawy bo mysipehahik. Hawa mykaranaha zuba humo motsasoko. Iwatsahi hawa tsimyzurukunaha zeka pykyhytutaha tsimaha.

<sup>18</sup> Tapara zikzurukunahaze isapybara ty tsikykaranaha. Ahazotsa watsa zikzurukunaha, sisopyk yhÿ tsikykaranaha iwatsahi ahasopyksapybyitsa tsikykaranaha. Deus zikwy humo meky watu tsimoziknaha. Ihumo ahamysapyrētsa tsimoziknaha. Hawa sa niy Sesus Kiristu ahasapyzeky zibezenaha. Ahasapyzeky nihyrikosokda iwaze Deus bo myoktyktsa niyzik. Atahi Deus ouro ty batu nyny niy. Parata ty kino niwatihi batu nyny niy. Ouro aiba eze mohokda. Iwaze parata niwatihi mohokda. Batu pykyhy ipokzitsi.

19 Deus Sesus hyrikosokdawy huak tsipokzitsarēna hiba. Kiristu nihyrikosokdaze ahasapy ziaксе. Taspu ahapokzi ziweke. Taparaktsa hozipyrykzatsa wa kytsa sapyzеky ziknasibakanaha. Iwatahi sisopyksapybyitsa nikaranaha Deus nisiokzohik hozipyrykzatsa ziknasiwezokonaha anahumo hi nisiokzohik. Hozipyrykzatsa sisapyrētsa zuba nisibakanaha. Hozipyrykzatsa simyitsapyrētsa zeka ba ziksibanaha. Atawata hi Kiristu ahasapyzеky nihyrikosokda. Imysapyrēnikita tu ahapokzi nihyrikosokda hozipyrykza wata niy.

20 Tapara Deus mybarawy isuknihibyize Sesus mymyoktyhyrykta ziwatawyhik. Iwatatu abazubata Deus tatse zipedahik. Mybarawy ezektsa bo inasik iwaze Deus bo pahaoktyhyryk. Aibaze myzubaha ihumo mospirikponaha.

21 Kyze Sesus nihyrikosokdaze Deus zihyritzikpowy. Myzubaha ibo iktsa maha. Atahi imysapyrēnikita wasani mykara. Iwatsahi taperyky. Ikiyahatsa Deus humo ahaspirikporētsa iwahi Deus mozihihik.

22 Abaka Deus harere bo yhỹ tsimykarannahaze, Deus hi:

– O asaktsa wasani mykaranaha. Mekywatu niyziknaha – niy. Ahatukytsa humo ahamy-pokzitsiukrētsa hỹ. Ba zikahape spihikbatanaha ahatuktsa humo ahamypokzitsiukuk.

23 Ahazotsa ikny tsipupurukuknaha. Ahazotsa mybarawy ezektsa niakbabanaha. Ikiyahatsa kino niwatihi tsimyyhyrikosokdanaha. Abaka ikiyahatsa tsimypurukzonaha hyrity watsa, Deus hyrytsa tsi-moziknaha. Deus ba zikyrikosokda. Katsaktsa

Deus harere bo yh̄y tsimykaranaha zeka Deus hyrytsa tsimoziknaha. Deus harere ba zikpyk, tawahi mypkyk. Ikiahatsa hi tsimypurukzonahatsa hyrity watsa ihyrytsa tsimoziknaha.

<sup>24</sup> Deus papeu humo

– Mybarawy ezektsa wihara sazik waha.

Abaka wihara sazik anatu byi

hana bo nasaziktōbaik.

Wihara sazik hana bo ja

atsoko nihokda

<sup>25</sup> Deus harere ba zikpyk.

Tawahi iharere mynapykyryk – niy.

Ana kino botu tsiwabynaha. Deus wasania ty tsiwabynahaze iharere bo yh̄y tsimykaranaha.

## 2

*Sesus harahare tsipokzitsiarēta hyrity wata.  
Sesus tuktsa Deus tyryktsa maha.*

<sup>1</sup> Kyze amy ty sisopyksapybyitsa batu h̄y zikaha ahamyspihikbata byrihuja. Wasape tsimykaranaha! Mektsa humo ahazokdi byrihuja! Ahasopyksapy byihuja! Ahaharerewabymybara byihuja! Iwa tsimykaranaha. Tapara ahaspirikpobyitsa tu tsikykaranaha. Abaka batu. Mekywatu tsimoziknaha.

<sup>2</sup> Mypehatsa ahahumo tsimypokzitsiukrēta. Iharere papeu humo ziwatahaka ana kino tsipinymyrykynaha! Ibykyhy ipurukuhu zytyk tawa taje tsotsik iakparawy. Ikiahatsa kyry watsa Deus harere ahakparawy. Iharere anawaha. Ibykyhy wotsik humo taypykyk anawa hi Deus harere humo meky watu tsimoziknaha. Ahamysapyrētsa tsimoziknaha.

<sup>3</sup> Iwaze Sesus humo ahaspirikporëtsa atahi Deus pahaoktyhyryk, atahi ihumo pahapokzitsiki.

<sup>4</sup> Mypehakatsa Sesus humo ahaspirikporëtsa. Atahi harahare ispitu zek tawata. Sesus zuba ispitu mynapykyryk. Wastuhu kytsa ihumo batu siakparawy. Sispirikpobyitsa hi ihumo batu siakparawy. Isoho:

– Atakta batu imysapy – sisopyk. Deus hi isoho:

– Atakta imysapyrënikita. Zikpehata ba zikmyi. Mybarawy ezektsa kabo mynasioktyhyryk – niy.

<sup>5</sup> Ikiahatsa Sesus humo tsimyspirikponaha zeka atahi ahahumo tsimypokzitsiukrëta. Ikiahatsa haraharezatatsa hyrity watsa tsimoziknaha. Deus wahoro zubata haraharezatatsa ty hi nizukniki. Asahi ihumo sispirikporëtsa iwahoro zubata hyrity watsa maha. Deus hyrikoso situk mynapykyryk iwatsahi iwahoro hyrity watsa maha. Abaka ikiahatsa hi Deus wahoro zubata eze ziknapamykysokonahatsa watsa tsimaha. Mekywatu tsimoziknaha. Deus hyrikoso ahatuk mynapykyryk humo ahamysapyrëtsa tsimoziknaha. Tubabatu Deus wahoro zubata eze ziknapamykysokonahatsa Deus zitsumuëhĩkĩnaha. Siwatsa ikiahatsa ziknapamykysokonahatsa watsa ikiahatsa Deus tsitsumuëhĩkĩnaha. Nawa haty Deus bo nyny niaha ana humo hi tsakurëta nikara. Atsatu nawa ha Deus bo nyny tsimaha ana humo hi tsakurëta mykara. Sesus humo ahaspirikporëtsaze Deus ahahumo tsakurëta mykara.

<sup>6</sup> Deus papeu humo ziwatahaka:

– Kytsa wahoro mozoknikinahaze haraharetsa mysiwatawykynaha.



Utakta harahare hyrity wata.  
Harahare tisapyrēta.

Harahare ustsā haraharezatatsa iwa babatsa  
tu buruhuwa nisizozokonaha.

Atahi harahare hyrity wata myzipeha.

Siaō sapy waha bo myzipeha.

Atahi myzubaha ibo iktsa zuba maha.

Wasani mykara.

Aty ihumo tispirikporēta atahi batu isikpyby.

Atahi tsakurēta hỹ

Iwa Deus papeu humo niy.

<sup>7</sup> Ikiahatsa Sesus humo ahaspirikporētsa ahabo  
harahare hyrity wata my. Harahare tisapyrēta.  
Ihumo sispirikpobyitsa Sesus batu siakparawy,  
atahi sibo harahare isapybyita hyritywa my. Deus  
harere papeu humo ziwatahaka:

– Wahoro suknikitsa ata harahare humo batu hỹ  
zikaha.

Ata harahare hi tisapyrēta niyzik.

Ata humo hi ustsā haraharezatatsa iwa babatsa  
buruhuwa nisizozokonaha – niy.

<sup>8</sup> Usa Deus papeu humo ziwatahakazo:

– Ata harahare humo hi kytsa mynarahana.

Kytsa Deus harere humo batu hỹ zikaha  
sisopyksapybyitsa nikaranaha.

Iwatsahi harahare hyrity wata nisimiywy – niy.

Ata hyrity wata Kiristu kytsa abazubatsa pe-  
hakatsa mozik. Asahi iharere bo batu hỹ zikaha  
natukyrikihyk nahatsa watsa. Hawa Deus niz-  
ihikik batu hỹ niaha.

<sup>9</sup> Ikiahatsa hi meky watu tsimoziknaha. Deus  
zahawatawy. Tubabatu ityryktsa Sudeutsa nisit-  
sihikik. Iwatahi zahawatahawy. Ikiahatsa Deus

wahoro zubata eze ziknapamykysokonahatsa hyrity watsa Deus tsitsumuẽhĩkĩnaha. Meky watu tsimoziknaha. Deus hyrytsa tsimoziknaha. Deus zahawatawy iwatsahi ipe tsimaha:

– O Deus myzo ikia zuba wasani tsimy kara. Ikia zuba tsamysapyrẽta. Ikia myhyrizikwanikita – tsimaha. Iwa ahamysopyksapybyitsa tsikykaranaha iwaze tsimoewyhiknaha ana ty hi tsi piwatawykynaha.

Tapara ikiahatsa kytsa miwa ezektsa watsa tsimaha. Abaka kytsa iwororoha buruktsa watsa tsimaha ahamysopyksapybyitsa tsikykaranaha tsimoewyhiknaha.

<sup>10</sup> Tapara ikiahatsa Deus hyrytsa byitsa tu. Abaka ihyrytsa babatsa tsikyziknaha. Tapara ahanamybyitsa watsa abaka batu. Abaka Deus ahahumo tsimypokzitsiukrẽta.

*Katsa Deus tuk tsimyzihikiknaha.*

<sup>11</sup> Kyze – O katukytsa ikiahatsa mybarawy eze sisukmotsa watsa tsimaha. Bipyritsa watsa. Mybarawy eze tsinapykyrykspyknaha. Iki ahatsa ahabo zuba mytsaty tsimykaranaha zeka ahamysopyksapybyitsa tsimykaranaha. Iki ahatsa tsimiyikinaha. Ahamysapybyitsa tsimykaranaha ana hi tsimoewynaha – my.

<sup>12</sup> Kytsa Sesus humo sispirikpobyritsa zimyi-jaikiknaha. Sesus tuktsa soho motsaso tsihikiknaha:

– Myokzeka batu wasani mykaranaha. Kytsa nisibaikiknahatsa watsa – mybarapetu mykaranaha. Iki ahatsa siokzeka batu zimyinaha. Ahahyryzikporẽtsa wasani tsimahaktsa!

Ahamysapyrētsa tsimaha iwaze ahasoho motsasokonaha:

— O asahi wasani mykaranaha — maha. Siharereziubyitsa ahasopyk wasaniha humo harereziu mykaranaha. Nawa puruze Sesus myziksizoze ahasoho tihi:

— O asaktsa simysapyrētsa — mykaranaha.

<sup>13</sup> Kyze ikiahatsa Sesus tuktsa tsimaha. Mypehakatsa Sesus hyrytsa tsimaha. Mypehakatsa harere bo yh̄y tahaktsa! Iwa tsimyzurukunaha zeka Sesus soho ty ka batu tyso:

— O atakta batu imysapy — maha. Iwa ba ziktsasonaha. Mypehakatsa abazubatsa Sesa harere bo yh̄y tsimykaranaha. Mypehakatsitsa ustsā hudikhudikwy ezektsa iharere bo yh̄y mykaranaha.

<sup>14</sup> Ahapehakatsa harere bo yh̄y tsimykaranaha. Deus harere humo Sesa zahapeha. Kytsa simysopyksapybyitsa nikaranaha ipokso sipybyrētsa. Kytsa hi simysapyrētsa sisoho:

— Myokzeka wasani tsawatsa tsimaha — mykaranaha.

<sup>15</sup> Asaktsa Sesus humo sispirikpobyitsa ahasoho pahaziubyri tsihikiknaha. Ikiahatsa hi tsipisapybanaha zeka batu zikaha.

<sup>16</sup> Zihitsa tsumuēh̄tsa pe:

— Tsimyzukehik — niy. Kyze ikia tsipiksi iwa hana wa tihi mykaranaha. Hana bo ja tahasapy tsihikiknaha nabo mokurunaha. Katsa Sesus humo tsimyspirikponaha zeka siwatsa mymyzi-hikrētsa. Myharere zuba zeka tyso so byitaha iwa zeka batu imysapy tsimykaranaha. Iwa tihi:

– Aba mymyzihikrētsa iwaze tsipipokzitsikinaha. Deus harere bo zuba yh̄y tsimykaranaha – tsimaha.

<sup>17</sup> Myzubaha bo wasani tsimykaranaha! Usta Sesus tuktsa ahaturkytsa humo ahamypokzitsiukrētsaktsa! Deus harere bo pykyhytuty yh̄y tsimykaranaha. Mypehakatsa abazubata harere bo yh̄y tsimykaranaha. Takino usta pehakatsa sihudikhudikwy ezektsa siharere bo yh̄y mykaranaha. Iwaze sizubarētsa bo wasani tsimykaranaha.

*Kiristu sininiwyky atawata tsimyzurukunahaktsa.*

<sup>18</sup> Kyze O Sesus tuktsa ahatsihitsa harere bo yh̄y tsimykaranaha. Ahatsihitsa ahabo wasani mykaranaha zeka siharere bo yh̄y tsimykaranaha. Ahatsihitsa ahabo wasani ahabyizeka niwatihi siharere bo hȳy tsimykaranaha. Ahatsihitsa simysapyrētsa harere bo yh̄y tsimykaranaha. Sisakimyijanikita zeka kino niwatihi siharere bo yh̄y tsimykaranaha.

<sup>19</sup> Usta kytsa pahasapybyikinaha zeka Deus harere bo yh̄y tsimykaranaha humo sinini tsimykaranahaze. Iwa Deus myzehikik ahahyrinymyrētsa. Ikiahatsa sinini tsimykaranaha zeka ahakubyrisoroku ja iwaze Deus tisapyrēna ty ahabo nyny my.

<sup>20</sup> Ahatsihitsa pahabetsakaknaha ahamysapybyitsa tsimykaranaha humo Deus tisapyrēna ty ahabo batu nyny ziky. Ahazikaranikitsa zeka pahasininiwyky iwaze Deus isapyrēnikia ty batu ahabo nyny ziky. Ikiahatsa kino tsipisapybakanaha zeka ahatsihitsa

pahasininiwykynaha tu iwaze Deus tisapyrēna ty ahabo nyny my. Ahapunihikrētsa tsmoziknaha.

<sup>21</sup> Ana humo kino Deus zahawatawyhik sinini tsmaha Kiristu wata zahawatawy.

Kiristu ahasapyzeken sinini nikara iwatsahi ikiahatsa sinini ykarawy bo ahawahi ba zikahasapynaha. Atahi imysapyrēnikita tuze sinini nikara. Iwata tsimyzurukunahaktsa ana bo kino Deus zahawatawyhik.

<sup>22</sup> Kiristu ba zimyi. Ba zikmyspihikbata.

<sup>23</sup> Utsa ihumo siharerewabymybarētsa atakta sibo batu harere. Kytsa zimyjakanahaze batu taty tsapusare niy. Tasukyritsitsa ty batu tyso:

– Ikiahatsa tsipiksapybyrikinaha iwatahi sinini tsmaha iwa mozihihik – my. Iwa batu tyso. Atahi:

– O Deus ikia kahumo tsipikpokzitsiki kahyrinymyrēta. Ikia hi wasani tsimykara. Kasukyritsitsa bo wasani tsimykara – niy. Iwa Deus bo nitsaso.

<sup>24</sup> Mysopyksapybara humo Kiristu nihyrikosokda. Iharapatawyhyta humo nihyrikosokdaze mysopyksapybyitsa tsimykarana mysapyzeken nihyrikosokda, iwaze mysopyksapybyitsa tsikykarana Deus nimyokzohik. Nihyrikosokda iwatsahi mypunihikrētsa tsikyziknaha. Batu mypyby. Mekywatu tsmoziknaha. Deus okzeka mysapyrētsa. Kiristu tetekwy humo tsikzororona.

<sup>25</sup> Tsikykmynaha. Katsaktsa hozipyrykzatsa hyrity watsa asahi ske byita buruk nizarana. Abaka Deus mymyoktyhyryk. Ituk tsinapykyryk-

naha. Atahi myhumo tsimypokzitsiukrëta. Iwaze myzarabyitsa wa tsimoziknaha.

### 3

#### *Hawa sisukzakatsa sisopyk.*

<sup>1</sup> Kyze nawa sipytsakaza! Ahapytsa harere bo yhỹ tykaranaha. Wastuhu ahapytsa Deus harere bo yhỹ ahabyizeka ikiahaka zuba iharere bo hỹ tsimykaranaha. Ikiahaka wasani tsimykaranaha zeka ahapytsa Deus harere bo hỹ mykaranaha. Ikiahaka ityso byizeka Deus harere bo hỹ mykaranaha.

<sup>2</sup> Ikiahaka wasani tsimyzurukunahaze ahapytsa tahapehe mykaranaha:

– Kaoke tatsa tsimysapyrëtsa. Atatsa iktsa zuba isopyk – mykara. Iwatahi Sesus Kiristu humo tispirikporëta mozik.

<sup>3</sup> Kykyryk pykyhytutaha! Ahasuk ty wasania tyzuba korokbyktaha! Ahasuk wasanita ty ko-robyk tsimaha zeka kytsa ahabo batu iktsaziu zikaha. Ahaharadi humo kino niwatihi hazizo hazizo byritaha iwatsahi kytsa ahabo batu ikt-saziu zikaha. Ahanahatsa humo ouro bara tu ahatsyhyrytariktsa ipokzitsi baratu.

<sup>4</sup> Mysuk mysykbaik batu zikokzo. Mynahatsa hana bo ja, mytsyhyrytariktsa mohokdanaha. Ahamoksapyrëtsa Deus okzeka batu ipokzitsi. Ahahyrizikararawy hiba Deus humo tsipokzitsarëta. Ahazikarabyrihu ja kytsa tysitsumuëhĩ ana humo hi Deus tsakurëta. Ba zikmyi ana humo kino Deus tsakurëta.

<sup>5</sup> Tubabatu taparakykyhy zikzurukunaha. Asizahi Deus humo sispirikporëza, asizahi Deus

tisapyrēna ty ziperykynaha. Asiza kino tahapytsa harere bo yh̄y ziknakaranaha. Tahapytsa humo simypokzitsiarēza h̄y. Iwazahi Deus okzeka simysapyrēza niyziknaha.

<sup>6</sup> Asiza Sara waza. Atatsa tabarikta Abarāo harere bo yh̄y ziknakara. Ikia kapehakatsa hyrity watsa nikara. Iwa atatsa tabarikta pe isopyk. Iwaze ikiahaka Sara waza tsimoziknaha. Aha-punihikrēza ahapyby byihuja Sara waza tsimaha. Iwaze Sara hyrytsa waza tsimoziknaha.

<sup>7</sup> Kyze kytsa bo motsasoko. Ahaokeza batu sipaik maha ana humo hi mytsatyziutaha. Iwatsahi tysipokzitsinahaktsa! Deus tabo pahaoktyhyryk iwa ahaokeza kino niwatihi tabo mysioktyhyryk. Asizahi iharere bo yh̄y maha zeka ikiahatsa watsa iwatsahi harapetok tu tabo pahaoktyhyryk. Atatsa ka tsipokzitsikinahaktsa! Iwatsa tsimyzurunaha zeka Deus bo tsimypamykysokonahaze pahawaby.

*Ahamysapyrētsa tsimykarannahatsa.*

<sup>8</sup> Kyze sizubarētsa bo kapehawy motsasoko. Astsa botu mytsaty tsimykarannaha! Tyharape pokzitsinahaktsa! Ustsa tahatsumuēhīnaha. Asa zuba batu tyso – uta zuba wasani – kasopyk iwa batu tyso. Tyharape pokzitsikinahaktsa!

<sup>9</sup> Deus zahawatawyhikze ahape niy. – Amy ty tisapyrēna ty ahabo nyny my – niy. Kytsa pahamyijakanaha zeka ikiahatsa sibo ba ziksimyija. Kytsa ahabo tahasakaninaha zeka awatu taha. Ikiahatsa hi tysipokzitsinaha.

<sup>10</sup> Mytsatyziutaha! Deus harere humo papeu ziwatahaka:  
– Atahi tawahi tsakurēta mozihihikik

atahi batu mybarapetu mykara. Ba zikbetsak.

<sup>11</sup> Mysopyksapybyritsa tsimoewynaha  
katsaktsa tsipisapybakanaha!

Mypehatsitsa batu imysapy mynakaranaha  
katsaktsa tsipiharereziukunaha.

<sup>12</sup> Mypehakatsa kytsa sisopyksapyrëtsa bo nasisu-  
paraka iwaze sihumo mysipokzitsiki.

Ibo mopamykysokonahaze mysiwabyziuku.

Kytsa sisopyksapybyitsa mykaranaha  
sihumo takyriki – niy.

Iwa Deus harere papeu humo ziwatahaka.

*Kiristu tuktsa ihumo sinini mykaranaha.*

<sup>13</sup> Iwaze tsipisapybakanaha zeka aty sa pa-  
hakniki

<sup>14</sup> Iwatuze wasani tsimykarannahaze siharerez-  
iubyitsa pahasapybyikinaha. Iwaze ahakurëtsa  
tsimoziknaha! Sipybyrëtsa tu nikaranaha ikia-  
hatsa ahapunihikrëtsa tsimoziknaha! Iwaze Deus  
tisapyrëna ty ahabo nyny my.

<sup>15</sup> Kiristu ahapehakatsa bo ka iktsazuba tahak-  
tsa! Iharere bo zuba ma tsimynakaranaha. Aty  
my zeka tahi:

– Hawa Sesus humo aspirikpo – my. Sesus  
humo ahaspirikporëtsa babatsa tsimaha zeka  
iwaze ahasikpybybyitsa Sesus soho sibo tsimyt-  
sasozuukunaha.

<sup>16</sup> Sibo tsimytasozuukunahaze sihumo ahamy-  
pokzitsirëtsa, ahaharereziuwytta ty iwatsahi  
piwabytoktonaha. Ahamysapyrëtsa zeka  
siharerewabymybaranikitsa ty ka ba ziksisonaha.  
Ahasopyksapyrëtsa humo ahaharere soho  
ziubyibatabyihuktsa mykaranaha!



— Kiristu hyrytsa batu simysapy maha — ana kino motsaso tsihikiknaha. Wasani tsimykaranaha iwatsahi batu siharerewabymybara pimykiknaha.

17 Kytsa pahasapybyinaha zeka ahamysapyrëtsa humo wasani. Kytsa pahasapybyikinaha Deus hi pahapokzi tsihikik. Ikiahatsa kytsa pahamyijakanaha zeka ahamysapybyitsa tsimykaranaha humo batu wasani. Ana humo hi Deus takyriki.

18 Kiristu soho bo mytsatyziutaha! Hawa nihyrikosokda mytsatyziu tsimaha. Mypokzitsikitsa mysapyzeken nihyrikosokda. Estuba zuba nihyrikosokda iwaze Deus mysopyksapybyitsa tsikykaranaha Kiristu humo mymyokzohik. Kiristu imysapyrënikita tuze siharereziubyitsa sapyzeken nihyrikosokda. Iwaze Deus bo mymyoktyhyryk. Mybarawy boze isukyrytsitsa inury zibezenaha. Deus zihyrizikpowy.

19 Kiristu sinini ykarawy bo inakozore. Anaeze Deus harere nitsasoko. Sinini ziknakaranahatsa hurukwy eze hi Deus harere nitsasoko.

20 Asahi Deus harere bo batu hÿ zikaha. Tubabatu Noe tsaraha puëtsikbyita nizuknikize Deus harere bo batu hÿ zikaha. Deus mybarawy ezektsa humo iakyri tsihikbyita nikara. Tsakubyrisorokrëta nikara iharere bo yhÿ maha ziperyky. Sizubabyitsa tu iharere bo hyÿ nikaranaha. Oito zuba iharere bo ma nikaranaha. Oito zuba tsaraha puëtsikbyita bo nipupunaha. Deus oito zuba nasizuk. Asahi zuba tsaraha

puẽtsikbyita eze tu niapykyryknaha. Ustsaktsa pihik bo tahababaiknaha.

<sup>21</sup> Pihik kino myharasusuwy soho piwatawyky. Myharasusunahaze ba zikmypiknaha. Katsaktsa tsimyharasusunahaze myzubaratsa pe:

– Abaka Deus okzeka wasani tsimaha. Iharere bo zuba hyỹ tsimykaranaha. Sesus nihyrikosokda na humo mysapyrẽtsa tsimoziknaha – tsimaha. Anahi pihik eze myharasusuhiknahaze myzubaha bo tsipiwatawyna. Sesus Kiristu nihyrizikpozo anahumo hi iwatsa tsimykaranaha.

<sup>22</sup> Ata hi bijoikpe bo nido. Deus tuk napykyryk. Ipanuryk taba mynapykyryk. Sizubarẽtsa iharere bo hyỹ mynakaranaha. Bijoikpe iknyktsa Deus tsumuẽhĩtsitsa, simyharerewabyrẽtsa zikwytsitsa bijoikpe pehatsitsa iwatsa Sesus Kiristu harere bo ma mynakaranaha.

## 4

*Hawa Kiristu zikzuruku ikiahatsa iwatsa tsimyzurukunaha.*

<sup>1</sup> Kiristu mybarawy eze tuze sinini nikara. Ana bo kino mytsatzyiutaha! Mypokzitsiwy tuk sinini nikara iwatsahi ikiahatsa hi atsatu mytsaty tahaktsa. Ikiahatsa kino niwatihi aba sinini tsimaha tu tsikahazozikymybanaha. Sinini tsimaha zeka imysapybara humo batu hỹ zikaha iwatsahi batu ahamy wasani tsimykaranaha.

<sup>2</sup> Tapara ahaharere bo zuba yhỹ ziknakaranaha abaka batu, Deus harere bo zuba ma tsinakaranaha.

<sup>3</sup> Tubabatu kytsa sispirikpobyitsa watsa zikzurukunaha. Imysapybara ty zuba ziknakaranaha. Ana hi niwazuba tsikaha! Tapara wytykyryk ziknasisapybyrikinaha. Utsa kytsa nasiwowokoronaha, jabyiza ziknasipyrikyknaha ustsya kytsa ziknasipyrikyknaha, tsõsõ zikzikukunaha humo batu kyik ziky, tsahamypyirjagrõtsa, deusbyitsa bo zuba ziknapamykysonaha. Abaka asa kino botu nepykanaha niwazuba.

<sup>4</sup> Abaka sispirikpobyitsa okzeka ikiahatsa Sesus humo meky watu tsimoziknaha. Ahamysapyrõtsa iwatsahi pahasapybyrikinaha. Ikiahatsa imysapybara ba hõ zikaha. Amy ty batu imysapy batu situk zikaha ana humo kino batu sihyrinymyry iwatsahi ahasoho humo siharerewabymybarõtsa. Ahasoho humo mybarapetu mykaranaha.

<sup>5</sup> Siharerewabymybarõtsa tu ka Deus bo tytsasonaha. Hawa mybarawy eze zikzurukunaha Deus bo motsasonaha. Aty wasani ziknakara Deus tisapyrõna ty ibo nyny my. Atakta imysapybyita tu ziknakara Deus sinini ykarawy bo myzipeha. Kiristu myziksizoze kytsa ihuak ty sibo nyny my. Iwaze kytsa simysopyksapybyitsa kino niwatihi sihuak ty sibo nyny my.

<sup>6</sup> Tubabatu myzotsa nihyrikosokdanaha, hawa mybarawy eze zikzurukunaha, Deus nisiny. Atahi sihuak ty sibo nyny niy. Katsa mywatsa sihuak ty Deus sibo nyny niy. Kiristu Deus harere sibo nitsasoko. Iwaze asaktsa sispitutsa kino niwatihi Deus tuk tahawahi mynapykyryknaha.

*Isapyrõnikia sohotsitsa ustsya bo tysitsumuõhõnaha.*

<sup>7</sup> Aibani tsizubarēna nepyk. Ikiahatsa hi Deus bo tsimypamykysokonaha. Batu ahakubyrizikzumu. Ahape tu ahasopyk tsimykymynahaktsa iwaze Deus bo tsimynapamykysokonaha.

<sup>8</sup> Tyharape pokzitsikinahaktsa! Ahamys-apyrētsa tsimaha iwatsahi ahatukytsa sisopyksapybyitsa nikaranaha ana soho bo hi batu mytsaty zikaha. Iwa tsimyzurunaha zeka Deus okzeka wasani tsimaha.

<sup>9</sup> Ahatukytsa ahawahoro bo mozumukunahaze ikiahatsa ispe tsimaha:

– Kawahoro bo paku paku tynaha tohi buruk tihi ahawanu tyhāitaha tsimaha. Iwa tsimytsasonaha sisukmotsa bo tsimaha. Ahaharerehakyhyk byihuja.

<sup>10</sup> Deus tisapyrēna ty mybo nyny my. Iwaze mywatu tsiaksekenaha. Iwatsahi ustsā tahatsumuēhīnaha.

<sup>11</sup> Ustsā kytsa bo tsimypamykysokonahaze Deus harere sibo tsimytsasokonaha. Ustsā bo tsimysitsumuēhīnahaze Deus zikwy humo tsi piwatawykynaha. Iwaze kytsa:

“Deus zuba imysapyrēnikita my. Ihyrytsa bo tisapyrēna ty nyny my. Ana bo kino iktsa tsimaha” – mykaranaha. Katsaktsa Sesus Kiristu bo tsimyt-sasokonaha:

– O ikia zuba wasani tsimy kara. Ikia hi tsamys-apyrēta aharere bo zuba tsiwabytoktokonaha – tsimaha. Iwa tsimytsasoikiknaha tawahi ituk tsimynapykyryknaha. Iwa hŷ my.

*Hawa Kiristu tuktsa wa sinini tsimykaranaha.*

<sup>12</sup> Katukytsa ahahumo kamypokzitsiarēta. Sinini tsimykaranaha zeka Kiristu humo

ahaspirikporētsa iwatsahi ahapyby byihuja. Ikiyahatsa Sesus pahadutu. Batu tyso:

– Amo skaraba sinini tsimykaranaha. Utsa kytsa sininiwy bo batu istykzo – tsimaha. Iwa batu tyso. Sinini tsimykaranaha zeka batu ahasukatsihik.

<sup>13</sup> Kiristu ahaziky wata niyzik. Atahi sinini nikara atawatahi ikiahatsa kino tsimaha. Abaka sinini tsimykaranaha bykyze Kiristu imysapyrēnikita tu piwatawykyze ahakurētsa hỹ. Ikiyahatsa ahamysapyrētsa iwata tsimoziknaha. Iwaze ahakurētsa hỹ.

<sup>14</sup> Ikiyahatsa Kiristu hyrytsa tsimaha. Asaktsa Sesus humo sispirikpobyitsa ahasoho humo siharerewabymybarētsa. Zahasohozibyibatakanahaze ahakurētsaktsa! Pahasohometukunaha zeka Deus hyrikoso ahatuk mynapykyryk. Ana bo kino mytsatyziu tsimahaktsa! Hawa Deus hyrikoso wasani mynakara iwatahi ahatuk mynapykyryk, utsa siharerewabymybaranikitsa anahi piwatawyky.

<sup>15</sup> Kytsa harape ty beze beze byitaha. Utsa namy ty ka ykse ykse byitaha. Ahatsyhyryboa byihuja! Utsa kytsa humo batu isty myija. Batu ahaharerewabymybara. Iwa tsimykaranaha zeka kytsa pahasapybyikinaha ana humo hi wasani my.

<sup>16</sup> Sinini tsimykaranaha zeka Kiristu hyrytsa humo meky watu my. Ana humo kino batu ahasikyby. Ikiyahatsa hi:

– O Deus myzo sinini tsimykaranaha Kiristu hyrytsa humo iwaze mykurētsa – tsimaha. Kiristu

humo kytsa pahamyijakanahaze iwa Deus bo tyt-sasonaha.

<sup>17</sup> Abaka Deus mybarawy ezektsa bo iktsa mynakara. Asaktsa ihyrytsa mysimiyjakanaha sibo iktsa mynakara. Amo simysapybyitsa mykaranaha ana humo hi sihuak ty sibo nyny my. Aibani sihuak ty sibo nyny my. Sinini ykarawy bo mysipeha. Iwaze asa hi wasaniha humo batu sispirikpo iwatsahi sinini ykarawy bo mysipeha.

<sup>18</sup> Deus harere papeu humo ziwatahaka:  
– Tsihokdaharēnaha zeka simysapyrētsa Deus bo mysioktyhyryk.

Iwaze hawa ja asaktsa sisopyksapybyitsa nikaranaha  
ana humo hi tsihokdaharēna hỹ.

Asaktsa Deus harere bo yhỹ habyitsa mykaranaha Deus bo batu mysioktyhyryk, asahi sinini ykarawy bo mysipehahik – niy.

<sup>19</sup> Iwaze katsaktsa Deus harere bo ma tsimahaze kytsa mymymyijakanaha ana hi Deus myzehikik iwatsahi ihumo myspirikporētsa hỹ. Mybarawysuknitsa humo myspirikporētsa. Iwaze tyzipokzitsikinahaktsa! Deus hi myhumo tsimypokzitsiukrēta babata mybarawysuknitsa myhumo tsimypokzitsiarēta hỹ.

## 5

### *Deus tuktsa hozipyrykzatsa watsa maha.*

<sup>1</sup> Abaka myspirikpokonahatsa bo pahapehaka ikiahatsa humo Sesus tuktsa sipokzitsikitsa pahapehaka. Uta kino niwatihi ikiahatsa watsa Sesus tuktsa sipokzitsikitsa. Hawa Kiristu sinini nikara motsasoko. Utakta ibo iktsa iky. Kaokzetu

nitsakikinaha. Deus sizubarētsa bo Kiristu imys-apyrēnikita mysiwatawy. Iwaze utakta niwatihi iwata kamysapyrēta mozik.

<sup>2</sup> Deus zahawatawy ihyrytsa myspirikpokotsa tsimoziknaha ana humo hi zahawatawyhik. Iwatsahi hawa hozipyrykzatsa perytsitsa mynasipokzikinahatsitsa iwatsa ikiahatsa Deus hyrytsa tynasipokzitsikinahaktsa kytsa! Mykzoziurētsa iwatsahi tatsumuēhīnaha hỹ. Ahahyritzokzawy humo ahakurētsaktsa anahi Deus mozihikik. Batu ahape tu zikaha:

– Tyzeka ja kytsa okyrysaro ty kabo nyny maha – my. Iwa zeka batu mytsaty tsimaha. Ahape tu ahasopyk:

– Hawaze kytsa tahatsumuēhīnaha – tsimaha. Iwa ahape tu ahasopyk.

<sup>3</sup> Isty ykzo ykzo byitaha. Isty betsak betsak byitaha sihumo tysipokzitsikinaha. Wasani tsimykaranaha. Iwa tsimyzurukunaha zeka ahawatsa wasani mykaranaha niwatihi. Pahasopykziukunaha. Asa hi:

– Myspirikponahatsa simysapyrētsa astsatu tsimyzurunahaktsa kytsa – maha.

<sup>4</sup> Kiristu mysopykanikita my. Atahi mykzotsa hozipyrykzatsa perytsitsa wata my. Kiristu myziksizoze ihuak ty ahabo nyny my. Hawa mybarawy ezektsa siharereziuwysitsa sitsohorik ty nyny niaha. Sitsorik ty ouro ty nyny nikaranaha. Bykyze ouro mohokda. Ikiahatsa hi Deus is-apyrēnikia ty ahabo nyny my zeka. Anahi tawahi tisapyrēna.

<sup>5</sup> O ahaypykyhyzytyktsa! Pykyhytutaha hawa haty sitsaikbatsa mopamykysokonahaze siharere

bo ma tynakaranaha. Ahazubarētsa tahapet-sumuēhīnaha!

– Uta zuba wasani mykara – iwa batu tyso. Tahaharerewabynahakta! Deus harere ziwataha:

– Asa sizokzianikitsa utakta sihumo ikykyriki awatutsa zuba mysitsihikik. Asa sisorokbyitsa mysitsumuēhīekik hỹ – niy.

<sup>6</sup> Iwatsahi ikiahatsa myhyrizikwanikita ihumo tsahamozikrētsa tsimoziknaha. Deus izikwyrēnikita ba hawa tohi zikzukninaha. Ikiahatsa ihumo tsahamozikrētsa tsimoziknahaze Deus ahamumo tsakurēta mozik.

<sup>7</sup> Paikpa mytsaty tsimykaranaha zeka Deus bo tsimypamykysonaha:

– O Deus myzo paikpa mytsaty ikykara. Ikia humo kaspirikporēta iwatahi ikia tsipiktsumuēhī – tsimaha. Iwa ibo tytsasonaha iwatahi ahamumo tsimypokzitsiukrēta mynakara.

<sup>8</sup> Tsikymynahaktsa tsihasuparakanahaktsa! Ahasopyksapybyitsa tsimykaranaha tsmoewynaha. Parini irapaze kakaik myze. Tawata Satanas mypauktaba pyryrykba mykara. Sesus humo myspirikporētsa ana kino mopyk tsihikik. Ihumo pykyhytutaha! Sesus humo ahaspirikporētsa iwatsahi Satanas harere bo ba hỹ zikaha.

<sup>9</sup> Tsikahapunihiknahaktsa. Satanas hyrikoso sapybara pēhaktsa harere bo waby waby byitaha. Ikiahatsa ipe tsimaha:

– Aharere batu mykparawy. Aharere bo batu hỹ – tsimykaranaha. Iwa ibo tsimytsasoikiknaha. Ahawatsa usts Sesus tuktsa sinini nikaranaha.



Nanabyitaba ahatukytsa Sesus humo mymymyi-jakanaha ana kino ahahyrinymyrëtsa.

<sup>10</sup> Sininispyk tsimykaranaha. Deus ahahumo tsimypokzitsiukrëta. Kiristu imysapyrënikita. Deus zahawatawyhik Kiristu wata tsimoziknaha. Kiristu tuk tsimyzurukunaha. Deus humo wasani tsimykaranaha Sesus humo tyspirikpotohinahaktsa! Ana humo hi pahatsumuëhñekik. Deus zikwy humo tsahamyharerewabyrëtsa tsimoziknaha. Sesus tsipunihikrëta my iwaze ikiahatsa iwata tsimoziknaha. Atahi tawahi imysapyrënikita. Iwaze ikiahatsa iwata tsimoziknaha hñ, Sesus zikwy humo ahamysapyrëtsa tsimoziknaha.

<sup>11</sup> Izikwy tawahi napykyryk. Myzubahatsa pehakatsa mozik. Abazubata mozik myzubaha iharere bo zuba hyñ mynakaranaha. Batu aty tohi iharere bo batu ma zikaha. Iwa hñ.

*Abaka pepykyryk, katukytsa humo myhyrizik-barëtsa.*

<sup>12</sup> Abaka kawataha mopykyk. Kapapeutsa iki-ahatsa bo izubabaratu. Siras Sesus harere bo hyñ mynakara atahi kapapeu ty ahabo nyny my. Ata kino myzipaha kapapeu ty ahabo nyny my. Uta pahakusukniwyky iwatahi papeu humo pi-watahaka. Deus myhumo tsimypokzitsiukrëta iharere bo zuba hyñ mynakara. Iwatsahi ihumo tyspirikpotohikinahaktsa!

<sup>13</sup> Kytsa kapauk bazektsa ahahumo sihyrizik-barëtsa. Asahi Sesus tuktsa niwatihi Babironija ezektsa maha. Asahi ikiahatsa watsa Deus nisi-watawyhik. Marakos niwatihi ahahumo tsihyrizikbarëta. Atahi katse wata.

<sup>14</sup> Tyharape pokzitsikinahaktsa! Iwaze tyhara-  
pehapyryknahaktsa!

*Deus pahasapywyky.*

Utakta Deus bo mopamykysoikik ipe my:

– O myzo ahahyrytsa batu paikpa mytsaty  
zikaha. Ikia hi tysiakusukniwykykta – my. Ni-  
wazuba.

Peduru

# **Deus Harere Aibaky Sesus mymyspirikpoko naha**

## **New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

2f0260ea-5969-5180-9ac5-183d63a989f1